

## 每週經課朗誦經文（巴克禮漢羅/教羅）2015/01/04

### 共同經課-1 耶利米書第三十一章七節～十四節

7 耶和華 án-ni 講，Lín tiòh 為雅各唱歡喜 ê 歌，為萬國中做頭 ê 國出大聲，傳播 o-ló 講，耶和華 ah，救你 ê 百姓以色列所 chhun ê 人。8 看 ah，我 beh chhoā in tùi 北方來，聚集 in tùi 地極來；kap in 來 ê，有 chhi<sup>n</sup>-mî-ê、跛腳 ê、帶娠(sin)ê、beh 生 kiá<sup>n</sup>-ê，kui 大陣相 kap 來。9 In beh 啼哭來，我 beh tī 祈禱 chhoā in；我 beh tī 正直 boē 跋倒 ê 路 chhoā in 到河邊；因為我是以色列 ê 父，Í-hoat-liân 做我 ê 大 kiá<sup>n</sup>。10 列國 ah，tiòh 聽耶和華 ê 話，傳報 tī 遠 ê 海嶼，講，趕散以色列 ê beh 聚集伊，koh 顧守伊，親像牧者顧守伊 ê 羊群。11 因為耶和華已經救贖雅各，贖回伊脫離比伊 khah 強 ê 手。12 In beh 到錫安高 ê 所在唱歌；koh beh 親像河水流，到耶和華恩典 ê 地，得 tiòh 五穀、酒、油、羊群、牛群 ê 細隻 ê；in ê 心 beh 親像灌 ak ê 園，lóng 無 koh 憂苦。13 Hit 時在室女 beh 跳舞來歡喜，少年人老人亦 beh 相 kap 歡喜；因為我 beh hō in ê 悲哀變做歡喜，亦 beh 安慰 in，hō in tī 憂悶了後來快樂。14 我 beh 用油膩 hō 祭司 ê 心滿足；我 ê 百姓亦 beh 因為我 ê 恩惠滿意；這是耶和華講 ê。

### 共同經課-2 詩篇一百四十七篇十二節～二十節

12 耶路撒冷 ah，你 tiòh 稱呼耶和華；錫安 ah，你 tiòh o-ló 你 ê 上帝。13 因為伊堅固你 ê 門拱；賜福 hō 你中間 ê kiá<sup>n</sup> 兒。14 伊 hō 你 ê 境內太平；用 siōng 好 ê 麥 hō 你食飽。15 伊發出命令 tī 地裡，伊 ê 話頒行真緊。16 伊降落雪親像棉花，亦落霜親像火灰。17 伊 hiat 落雹一塊一塊；伊發出寒清，chī-chūi 擋 oē-tiâu？18 伊一下出令，chiah-ê 就 lóng 溶；伊 hō 風吹，水就流。19 伊將伊 ê 話指示雅各，將伊 ê 律例 kap 判斷，指示以色列。20 伊 m̄-bat án-ni 款待別國；伊 ê 判斷，in lóng m̄-bat。Lín tiòh o-ló 耶和華。

### 共同經課-3 以弗所書一章三節～十四節

3 願咱 ê 主耶穌基督 ê 上帝，也是伊 ê 父，得 tiòh o-ló；伊 tī 基督 bat 賞賜咱 tī 天裡 tak 項屬 tī 神 ê 福氣；4 就是照伊創造世間 ê 事先 tī 基督揀咱，hō 咱 tī 伊 ê 面前成做聖，無 thang 嫌；5 伊照伊 ê 旨意所歡喜 ê，用仁愛事先定 tiòh 咱 tùi 耶穌基督得 tiòh 做 kiá<sup>n</sup>，來歸 tī 伊，6 hō 伊恩典 ê 榮光得 tiòh o-ló；chit-ê 恩典就是伊 tī 所疼 ê Kiá<sup>n</sup> 賞賜咱 ê；7 tiàm-tī 伊咱 tùi 伊 ê 血得 tiòh 贖回，赦免罪過，照伊恩典 ê 富有；8 伊將 chit-ê 恩典，用 tak 樣 ê 智慧 kap 見識，賞賜咱到滿滿；9 已經 hō 咱知伊旨意 ê 奧妙，照伊 ê 好意，就是伊 tī 本身所事先定 tiòh ê，10 beh tī chiah-ê 日期完滿 ê 時，設法 hō 萬物，不論 tī 天裡 ê tī 地裡 ê，lóng tī 基督來合一；11 tiàm-tī 伊咱也成成家業，就是事先受定 tiòh ê，照 hit-ê thàn 家己 ê 旨意行萬項有 ê ê 意思，12 beh hō 伊 ê 榮光 tùi 阮事先 òng 望 tī 基督 ê 人得 tiòh o-ló；13 tiàm-tī 伊，lín 也已經聽見真理 ê 道，救 lín ê 福音，既然信就 tiàm-tī 伊有受所應允 ê 聖神蓋印，14 伊就是做咱承接業 ê chún-tng，到上帝所得 tiòh ê 業贖回，hō 伊 ê 榮光得 tiòh o-ló。

### 共同經課-4 約翰福音一章一節～九節、十節-十八節

1 Tī 起頭有道，道 kap 上帝 sa<sup>n</sup>-kap tī-teh，道就是上帝。2 Chit-ê 道 tī 起頭 kap 上帝 sa<sup>n</sup>-kap tī-teh。3 萬物 tùi 道來創造；見若受創造 ê，無一項 m̄ 是對伊來創造。4 活命 tī 伊 ê 內面；chit-ê 活命是人 ê 光。5 光照 tī 烏暗；烏暗無接納伊。6 有一人 tùi 上帝差來，名叫約翰。7 Chit-ê 人來做干證，是 beh 為 tiòh 光做干證，hō 眾人對伊來信。8 伊 m̄ 是 hit-ê 光，是 beh 為 tiòh 光做干證 nā-tiā<sup>n</sup>。9 有真 ê 光來入世間，teh 照萬人。10 伊 tī 世間，世間對伊來創造，也世間 m̄-bat 伊。11 伊到家己 ê 所在，也家己 ê 人 m̄ 接納伊。12 見若接納伊 ê，就是信伊 ê 名 ê 人，伊就賞賜 in 有權，成做上帝 ê kiá<sup>n</sup> 兒；13 in m̄ 是 tùi 血氣，亦 m̄ 是 tùi 肉體 ê 意思，亦 m̄ 是 tùi 人 ê 意思生 ê，就是 tùi 上帝。14 道成肉體，khia 起 tī 咱中間，有恩典 kap 真理滿滿；koh 阮 bat 看見伊 ê 榮光，親像獨生 ê kiá<sup>n</sup> tùi 父所得 ê 榮光。15 約翰為 tiòh 伊做干證，叫講，Chit-ê 就是我所講，tè 尾我來 ê，成做我 ê 事先；因為伊本事先我 tī-teh。16 因為 tùi 伊 ê 充滿咱 lóng 有所受，就恩典續接恩典。17 因為律法是 tùi 摩西來傳；恩典 kap 真理是 tùi 耶穌基督 chiah 有。18 Bē bat 有人看見上帝；只有 tī 父心懷中獨生 ê kiá<sup>n</sup> 有表明伊。